



Reforme u Brčkom su počele, ali predstoji još mnogo posla

Prvi zamjenik visokog predstavnika i supervizor za Brčko Distrikt, Michael Scanlan, pozdravio je zakonodavne korake koje je jučer napravila Skupština Distrikta u pravcu zaštite osnovnih prava građana, te unapređenja fiskalne discipline i transparentnosti u trošenju javnih sredstava.

Usvojeni Zakon o mirnom okupljanju, kako se navodi u zajedničkom saopćenju sa našim međunarodnim partnerima, uvodi evropske i međunarodne standarde o slobodi okupljanja i postavlja presedan za ostatak zemlje o tome kako treba jačati demokratiju.

“Ovo je primjer kako Brčko može biti predvodnik reformi u BiH, te očekujemo isto i u vezi sa Zakonom o sukobu interesa,” izjavio je supervizor.

U tom kontekstu, supervizor je također pohvalio i novu dinamiku koja je sve očitija u Distriktu u pogledu jačanja odgovornosti javnih zvaničnika i osiguranja transparentnog, usmjerenog i efikasnog trošenja novca poreskih obveznika.

Naredni koraci podrazumijevaju usvajanje Zakona o udruženjima i fondacijama u septembru, osiguranje sredstava za prečišćavanje biračkih spiskova u predstojećem rebalansu budžeta, te stalnu podršku za razvoj infrastrukture i projekte energetske efikasnosti u suradnji sa međunarodnim partnerima.

Krajnji rezultat će biti bolji kvalitet života u ovoj zajednici i privlačan ambijent za investitore u cilju stvaranja dobro plaćenih radnih mjesta u privatnom sektoru koja su potrebna Brčko Distriktu da doživi prosperitet kao zajednica.

Stvaranje neophodnog zakonskog okvira za zaštitu prava nacionalnih manjina usvajanjem Zakona o pravima nacionalnih manjina u septembru predstavljat će još jedan primjer kako Distrikt štiti svoje građane u skladu sa evropskim normama i standardima.

Sve ove mjere, zajedno sa objavljivanjem javnog registra prihoda uposlenika u javnom sektoru u augustu, koraci su u pravcu vraćanja povjerenja zajednice u upravu Brčko Distrikta i predstojeći izborni proces, dodao je supervizor.

Danas se supervizor u Brčkom sastao sa gradonačelnikom i zamjenikom gradonačelnika, Sinišom Milićem i Antom Domićem, kao i sa potpredsjednikom Skupštine Distrikta, Ivom Filipovićem. Sastanak je održan uz striktno pridržavanje svih epidemioloških sigurnosnih mjera.

Supervizor i dalje poziva sve građane Brčkog da se u potpunosti pridržavaju naredbi nadležnih organa u cilju suzbijanja širenja covid-19. Ovo nije hipotetička stvar, već briga za javno zdravlje i blagostanje Distrikta!

(Fotografija na naslovnici: Arhiv OHR-a)